

ISAHLUKO 14

GABALALA

Umthetho Wamazwe Ngamazwe

Izivumelwano zamazwe ngamazwe

231. (1) Ukuthetha-thethana ngezivumelwano zamazwe ngamazwe nokutyikitywa kwazo ngumsebenzi karhulumente wezwelonke.
- (2) Isivumelwano samazwe ngamazwe siyinqamangela iRiphabliki kuphela emva kokuba sivunye ngesigqibo kokubini kwiNdlu yoWiso-mthetho nakwiBhunga lamaPhondo leZwelonke, ngaphandle kokuba sisivumelwano ekuthethwe ngaso kwisiqendwana (3).
- (3) Isivumelwano samazwe ngamazwe esiluhlobo lobuchwepheshe okanye esolawulo, okanye isivumelwano esingafunisi ukuba sivunye, ekungenwe kuso ngurhulumente wezwelonke, siyinqamangela iRiphabliki ngaphandle kokuvunywa yiNdlu yoWiso-mthetho naliBhunga lamaPhondo leZwelonke, kodwa masithiwe thaca kwiNdlu nakwiBhunga kungadanga kwaba lixesha elide.
- (4) Nasiphi na isivumelwano samazwe ngamazwe siba ngumthetho kwiRiphabliki xa sithelweni umthetho yindlu yowiso-mthetho yezwelonke; kodwa inxalenye yesivumelwano eziphumeza ngokwayo eye yavunywa yiPalamente ingumthetho kwiRiphabliki ngaphandle kokuba ayivisisani noMgaqo-siseko okanye ayivisisani noMthetho wePalamente.
- (5) IRiphabliki iyankqanyangelwa zizivumelwano zamazwe ngamazwe ezaziynqamangela iRiphabliki xa lo Mgaqo-siseko wawuqalisa ukusebenza.

Umthetho wamazwe ngamazwe oqhelekileyo

232. Umthetho wamazwe ngamazwe oqhelekileyo ungumthetho kwiRiphabliki ngaphandle kokuba awuvisisani noMgaqo-siseko okanye awuvisisani noMthetho wePalamente.

Ukusetyenziswa komthetho wamazwe ngamazwe

233. Xa zichaza intsingiselo yawo nawuphi na umthetho wepalamente, zonke iinkundla mazikhethe indlela yokuchaza intsingiselo ebhadlileyo evisisana nomthetho wamazwe ngamazwe endaweni yendlela yokuchaza intsingiselo engavisisaniyo nomthetho wamazwe ngamazwe.

Eminye imicimbi

Amaxwebhu-siseko amalungelo

234. Ukuze yendele inkqubo yentando yesininzi esekwe nguMgaqo-siseko, iPalamente isenokwamkela amaXwebhu-siseko amaLungelo avisisana nokutshiwo kuMgaqo-siseko.

Ukuzenzel' izigqibo

235. Ilungelo labantu baseMzantsi-Afrika xa bebonke lokuzenzel' izigqibo, njengoko libonakaliswe kulo Mgaqo-siseko, alikuthinteli, kodwa ngokulawulwa yimida yeli lungelo, ukwamkelwa kwengcamango yelungelo lokuzenzel' izigqibo kwalo naliphi na iqela loluntu elinelifa elifanayo lenkcubeko nolwimi, kumhlaba othile kwiRiphabliki okanye ngenye indlela, egqitywe ngumthetho wepalamente wezwelonke.

Ukuxhaswa ngemali kwamaqela opolitiko

236. Ngenjongo yokukhuthaza intando yesininzi yamaqela amaninzi, umthetho wepalamente wezwelonke mawuvumele ukuxhaswa ngemali kwamaqela opolitiko anenxaxheba kwizindlu zowiso-mthetho, eyezwelonke nakwezamaphondo, exhaswa ngokungakhalazisiyo nangokobungakanani bawo.

Ukufezwa kweembopheleleko ngenkuthalo

237. Zonke iimbopheleleko ezingokoMgaqo-siseko mazenziwe ngenkuthalo nangaphandle kokulibazisa.

Ukuphathisa

238. Icandelo likarhulumente elingurhulumente nakuliphi na inqwanqwa likarhulumente—

- (a) linokuphathisa ngalo naliphi na igunya okanye umsebenzi, ekuligunya elinokusetyenziswa okanye okungumsebenzi onokwenziwa ngokomthetho wepalamente, liliphathisa naliphi na elinye icandelo likarhulumente elingurhulumente, kodwa ke kuxhomekeke ekubeni ukuphathisa oko kuyavisisana kusini na nomthetho wepalamente elisetyenziswa ngawo igunya elo okanye owenziwa ngawo umsebenzi lowo; okanye
- (b) linokusebenza naliphi na igunya okanye lenze nawuphi na umsebenzi liwenzela elinye icandelo likarhulumente elingurhulumente, likwenza oko ngokuphathiswa.

Ukuchazwa kwamagama

239. KuMgaqo-siseko, ngaphandle kokuba okanye okubhaliweyo kuwo kubonisa ngenye indlela—

“umthetho wepalamente wezwelonke” uquka—

- (a) umthetho wepalamente ozalwa ngomnye owenziwe ngokoMthetho wePalamente;
- (b) nomthetho wepalamente owawusebenza xa lo Mgaqo-siseko wawuqalisa ukusebenza, ube loo mthetho wepalamente uphantsi kukarhulumente wezwelonke;

“icandelo likarhulumente” —

- (a) lilo naliphi na isebe likarhulumente okanye iziko lolawulo kwinqwanqwa likarhulumente lezwelonke, kwinqwanqwa lamaphondo okanye kwinqwanqwa loorhulumente basekuhlaleni; okanye
- (b) naliphi na elinye igosa okanye iziko—
 - (i) elisebenza igunya okanye elenza umsebenzi ngokoMgaqo-siseko okanye ngokomgaqo-siseko wephondo; okanye
 - (ii) elisebenza igunya laseburhulumenteni okanye elenza umsebenzi waseburhulumenteni ngokwawo nawuphi na umthetho wepalamente, kodwa aliquki inkundla okanye umchopheli-matyala;

“umthetho wepalamente wephondo” uquka—

- (a) umthetho wepalamente ozalwa ngomnye owenziwe ngokoMthetho wephondo;
- (b) nomthetho wepalamente owawusebenza xa lo Mgaqo-siseko wawuqalisa ukusebenza, ube uphantsi kolawulo likarhulumente wephondo.

Xa kukho ukungafani kokubhaliweyo

240. Xa kunokuthi kubekho ukungafani kokubhaliweyo kuMgaqo-siseko, okubhalwe kwisiNgesi kuko okuya kwamkeleka.

Amalungiselelo exesha lotshintsho

241. ISihlomelo 6 sisebenza kutshintsho lokuwelela kwinkqubo entsha yoMgaqo-siseko esekwe sesi siqendu, sikwasebenza nakuwo nawuphi na umcimbi onento yokwenza nolo tshintsho.

Ukutshitshiswa kwemithetho

242. Imithetho ekhankanywe kwiSihlomelo 7 iyatshitshiswa, ngokulawulwa sisiqendu 243 nasiSihlomelo 6.

Igama lawo elifutshane nokuqalisa kwawo ukusebenza

243. (1) Lo Mthetho ubizwa ngokuba nguMgaqo-siseko weRiphabliki yoMzantsi-Afrika ka-1996, kwaye uqalisa ukusebenza msinya kangangoko kunokwenzeka ngomhla ogqitywe nguMongameli ngokwenza isihlokomiso, mhla lowo ongenakuba ngaphaya kowoku-1 kuJulayi 1997.
- (2) UMongameli usenokubeka imihla eyahlukahlukeneyo ngaphambi komhla okhankanywe kwisiqendwana (1) ekwenzela oko iinxalenye ezahlukeneyo zoMgaqo-siseko.
- (3) Ngaphandle kokuba okunye okubhaliweyo kubonisa ngenye indlela, xa inxalenye ethile yoMgaqo-siseko ithetha ngexesha owathi uMgaqo-siseko waqalisa ngalo ukusebenza, oko makuqondwe njengokubhekisela kwixesha eyathi loo nxalenye yaqalisa ngalo ukusebenza.
- (4) Ukuba inxalenye ethile yoMgaqo-siseko ibekelwe umhla othile ngokwesiqendwana (2), nayiphi na inxalenye ehambisana naleyo yoMgaqo-siseko weRiphabliki yoMzantsi-Afrika ka-1993 (uMthetho 200 ka-1993), ekhankanywe kwisihlokomiso, itshitshiswa ukususela kwakuloo mhla.

- (5) Isiqendu 213, 214, 215, 216, 218, 226, 227, 228, 229 nesama-230 ziqalisa ukusebenza ngomhla woku-1 kuJanuwari 1998, kodwa oku akukuthinteli ukuwiswa komthetho wepalamente, ngokwalo Mgaqo-siseko, okungumthetho wepalamente ekuthethwa ngawo kuyo nayiphi na kwezi nxa lenye ngaphambi kwaloo mhla. Kude kube nguloo mhla, naziphi na iinxalenye zoMgaqo-siseko weRiphabliki yoMzantsi-Afrika ka-1993, ezihambisana nezinye zihlala zisebenza.